

MIKA

Rohe-ahu Samaria bona Ierusalem latadai

- 1** ¹Iehova ena hereva, Mika, tau Moresete, enai e kau, Iuda
pavapavadia Iotam bona Ahasa bona Hesekia edia nega ai, Samaria
bona Ierusalem herevadia.
- ² Taunimanima iboumui ai, a kamonai;
tanobada mai lalona ġaudia iboudiai ida, a hakala;
Ğaubada Iehova ese baine habadelaimw,
Ğaubada ese ena dubu helaġana amo.
- ³ Badina be, a itaia, Iehova na ena gabu amo e raka lasimu,
ia na baine diho, tanobada ena atai gabudia baine moimoilaidia.
- ⁴ Ia henunai ororo bae veve,
bona koura bae parara,
wax lahi vairanai na heto,
ranu haga amo e hebubu dobimu na heto.
- ⁵ Ina idoinai na Iakob ena kerere dainai,
Israel besena ena kara dika dainai.
Iakob ena kerere be dahaka?
Ena kerere na Samaria ani?
Bona Iuda besena ena kara dika be dahaka?
Ena kara dika na Ierusalem ani?
- ⁶ Taunabunai, lau ese Samaria baina hasenua tano paka ai,
vine imeadia ihaddodia gabuna ai baina halaoa;
ena nadi na koura ai baina bubudia dobi,
ena badi nadidia baina hulalai.
- ⁷ Ena dirava laulaudia iboudiai bae huaridia patapata,
ena ariara karadia davadia iboudiai na lahi ese baine goledia oho;
ena kaivakuku iboudiai na lau ese baina habuadia tari;
badina be lebulebu hahinena ahuna amo e haboudia,
bena lebulebu hahinena ahuna ai ma baela.
- ⁸ Ina dainai baina rohe ahu, baina tai lolololo;

- egu dabua baina doki oho, gagaegu ai bainala;
 uda sisiadia na heheto baina tai lolololo,
 kokokoko na heheto baina tai badabada.
⁹ Badina be ia berona na basie hanamoa diba;
 Iuda ai vada e kau,
 egu bese taudia edia ikoukou ai vada e kau,
 Ierusalem ai vada e kau.
¹⁰ Gata al basio herevalaia,
 basio tai;
 Bete-le-afra ai
 ḡahu ai ba hekui-hekui.
¹¹ Safiri taumui e,
 emui dala ai ba raka lao,
 ḡaḡaemui ai, mai hemaraimui ida.
 Saanan taudia na
 asie raka lasimu;
 Bet-esele ena taitai ese
 ena gini gabuna na emui amo baine abia oho.
¹² Maroto taudia ese namo e nariamu,
 mai kudou-hetahadia ida;
 badina be dika na Iehova ena amo vada e diho,
 Ierusalem ikoukouna enai.
¹³ Lakisi taumui e,
 hosí na kariota ai ba guidia;
 umui na kara dika matamana
 Siona natuna kekenina enai,
 badina be umui lalomui ai
 Israel ena kerere e davaridia.
¹⁴ Taunabunai hahetoni herahiadia na
 Moresete-gata ba henia;
 Aksib rumadia na koikoi ḡaudia ai baela
 Israel pavapavadia ediai.
¹⁵ Maresa inoholaina taumui e,
 kwalimu tauna na ihadareremui totona ma baina mailaia;
 Israel hairaina na
 Adulama enai baine kau.
¹⁶ Kwaramui ba nau, huimui ba utu,
 emui lalokau memerodia daidiae;
 kwaramui ba nau, ugava kwaradia na heheto,
 badina be natumui na emui amo bae raka oho,
 gabu daudauna ai bae hanohodia.

Hahehis i taudia herevadia

- 2** ¹Kara havara e lalo hatamu,
 bona kara dika daladiah na edia mahuta patadia ai e haeromu taudia,
 madi ihabaidia!
 Daba e reremu ai, e karaiamu,
 badina be una na imodia lalodai.
- ² Biru tanodia e hekise-hekise henidiamu, bena e dadidiamu,
 rumu danu, bena e abidia ohomu;
 tau ta mai ena rumu ida,
 tau ta mai ahuna ida, e hahisihisidiamu.
- ³ Taunabunai Iehova ini e gwau tomamu:
 A itaia, ina iduhu ihadikana dalana na laloa hatamu,
 aiomui na ia metauna henuna amo basio abidia oho diba;
 bena basio raka mai hekokorokumui,
 badina be nega na baine dika.
- ⁴ Una dina ai ehona na latamui ai bae kurea lao kurea lao,
 edia rohe-ahu ai bae tai lolololo,
 baeto “Ai na vada a dika vaitani;
 ia ese egu bese ahuna e ha-idauamu,
 egu amo e abia ohomu.
 Ia ese emai biru tanodia na
 e guimai taudia e henidia hagau-hagaumu”.
- ⁵ Taunabunai, Iehova ena hebou taudia bogaragidiae,
 tau ta basine noho,
 tano hetoana na mari amo basine davaria.
- ⁶ Idia na e gwaugwaumu, “Basio haroro” e tomu;
 “gau unuhetomadia basio harorolai;
 ihahemaraida ġaudia ese basie lasida tao”.
- ⁷ Iakob besena e, ini e gwau tomamu be namo eiava?
 Iehova ena Lauma se haheaukamu a?
 Ini na iena kara a?
 Egu hereva ese raka maoromaoro tauna na
 asie hanamoamu a?
- ⁸ A umui na o tore isimu, egu bese taudia o inai henidiamu;
 maino taudia, heabidadama ai e raka hanaimu
 bona tuari asie laloa hatamu taudia,
 edia dabua o dabuidia ohomu.
- ⁹ Egu bese hahinedia na
 edia rumu namodia amo o luludia lasimu;
 bona natudia maraġidia edia amo

lau hairaigu o abia oho vaitanimu.

¹⁰ A tore isi, baola;

badina be ina na dia laḡa-ani gabuna ta;

badina be hahemiro ese e habuaimu,

e habuaia tarimu.

¹¹ Tau ta bema loaea-eva,

hereva asi anidia bona hereva koikoidia bema gwaurai,

bema toma “Vine ranuna bona inuinu ġaudia goadadia

baina harorolai henimui”,

ia na bema heġereġere ina bese enai,

edia haroro tauna ai bema lao.

¹² Iakob besena taumui e, momokani lau ese iboumui ai baina
haboumui,

Israel taudia kwabukwabudia danu baina haboudia.

Baina gogodia,

mamoe na edia maġu ai e hegogomu na heheto,

mamoe serina edia rei gabuna ai e nohomu na heto,

taunimanima hulumana, mai heloġo-heloġodia ida.

¹³ Maġu ihamauruna tauna na idia vairadiā bainela,

bena bae tata uru, ikoukou amo bae hanai,

unu amo bae didi lasi.

Edia pavapava ese baine gunalaidia,

Iehova na mata ai bainela.

Israel lothiadia ihabadedia

3 ¹Bena lau nato: Iakob besena ikwarana taumui e!
Israel besena ilohiana taumui e!

Hahemaoro ġoеваġoeva ikarana boma diba ani?

² Umui ese namo o inai heniamu,

bona dika o ura heniamu;

umui ese egu bese taudia kopidia o kopadia ohomu,

bona hidiodia na turiadia amo o vakadia ohomu;

³ umui ese egu bese taudia hidiodia o animu,

bona kopidia o kopadia ohomu,

bona turiadia o hakwaidudia rohorohomu,

bona o utudia sisisisimu,

vamu uro lalonai na heto,

hidio tohe lalonai na heto.

⁴ Bena Iehova bae tai henia,

a ia ese basine haere henidia;

una negana ai vairana na edia amo baine hunia,

- badina be idia na vada e kara dika.
- 5 Peroveta taudia ese egu besetaudia na
e hakaudia kereremu;
adia e davariamu negana ai
e boiboomu, e tomu “Maino”,
a adia se henidiamu tauna na
e tuari heniamu.
Iehova ese unu e herevalaidia tomamu.
- 6 Taunabunai hanua baine boi emui ai,
basio mata hanai,
bona baine dibura emui ai,
asi bagu-haoro ġauna.
Dina baine diho peroveta taudia latadi,
dina baine dibura idia daediae;
- 7 mata-hanai taudia na bae hahemaraidia,
bagu-haoro taudia danu bae hahemaraidia;
iboudiae ese ududia bae tao ahu,
badina be asi haere ta Dirava ena amo.
- 8 A lau na siahua i vada name honu,
Iehova ena Lauma ese vada e rohegu,
mai hahemaoro ġoevaġoevagu bona mai goadagu ida,
Iakob ena kerere bona Israel ena kara dika
ihahedinarai-henidia totona.
- 9 Iakob besena ikwarana taumui e!
Israel besena ilohiana taumui e!
Ina na ba kamonai.
Umui ese hahemaoro ġoevaġoeva o inai heniamu,
bona ahu korikoridua iboudiae o hakererediamu.
- 10 Umui ese Siona o haginiamu rara amo,
bona Ierusalem kara dika amo.
- 11 Ikwarana taudia na hahemaoro e karaiamu,
koikoi henitaona dainai;
ena hahelaġa taudia e hahedibamu, hevatu dainai;
ena peroveta taudia e bagu haoromu, moni dainai;
ġau tamona, idia ese Iehova e abidadama heniamu, e tomu:
Iehova na ita bogaragida ani?
Dika ta na latadai basine kau.
- 12 Taunabunai, umui daimui ai Siona bae ruaia,
biru tanona na heto;
Ierusalem na vada e heġiġi dobi rumadia senudia ai bainela,

bona dubu ororona na uda ese baine udaia ahu.

Iehova ena maino

- 4** ¹Dina gabedia ai Iehova ena dubu ororona na
ororo atai-hereana ai baine hahelao,
ororo daediae baine heabi isi.
Taunimanima ese ia lalonai bae didi vareai,
² bona bese momo baema, baeto:
Aoma, Iehova ena ororo ai baita dara dae,
Iakob ena Dirava ena dubu baita dae henia;
ia ese ena dala baine hadibalaida
bona iena dala ai baita raka helaoreana.
Badina be Siona lalona amo taravatu baine lasi,
bona Iehova ena hereva danu Ierusalem amo.
³ Ia ese taunimanima momo padadiai baine hahemaoro,
bona dauhai e nohomu besedia mai goadadia daidiae baine gwau
maoro;
bena edia dare na ruarua isivadia bae karalaidia,
bona edia io na ilapa bae karalaidia;
bese ta ese dare basine abia isi, bese ta ituari-henina totona,
bona tuari daladia basie tahudia;
⁴ a ta ta ena vine auna ena vine auna bona ena suke auna ena suke
auna
henudiae bae helai,
bona tau ta ese basine hagaridia;
badina be Iehova Sabaota na uduna amo vada e hereva.
⁵ Badina be bese iboudiae na e rakamu,
ta ta ena dirava ladana ena dirava ladana ai;
a ita ese Iehova, eda Dirava, ladana ai baita raka,
ela bona hanaihanai.

Israel iruha-negena

- ⁶ Iehova na e tomu:
Una dina ai lau ese ae-hedairike taudia baina haboudia,
bona vada e luludia oho taudia ma baina gogodia,
bona vada na hahisihisidia taudia danu.
⁷ Ae-hedairike taudia na bese kwabukwabuna ai baina halaodia,
bona e negedia daure taudia na bese mai goadana ai baina
halaodia;
bona Iehova ese baine lohiadia Siona ororona ai,
ina negana amo ela bona hanaihanai.

⁸ Oi, mamoe serina igimana kohorona,
 oi, Siona natuna kekenina ena ororo,
 oi dekemu ai siahū gunana ma baine kau,
 Ierusalem natuna kekenina ena basileia danu.

⁹ Dahaka dainai harihari o tai lolololomu?

 Oi na asi pavapavamu a?
 Emu hahealo tauna vada e mase,
 bena hisihisi ese e gugubamu
 hekamonai hahinena na heto a?

¹⁰ Siona natuna kekenina e,
 ba hehure-hehure, ba ġanaġana,
 hekamonai hahinena na heto;
 badina be hanua lalona amo ba raka lasi,
 tano paka ai ba noho,
 Babulono do baola.
 Unuseni ai do bae rauamu,
 unuseni ai Iehova ese oi inaimu imadia amo baine hamaurimu.

¹¹ Harihari bese momo e heboumu,
 ituari-henimu totona;
 idia na e tomu “Bae hamiroa,
 bena matada ese Siona bae raraia tao”.

¹² A idia na Iehova ena lalo-hadai asi dibadia,
 ena lalo-hata ġaudia asi dibadia;
 asi dibadia ia ese vada e haboudia,
 uit ikumidia na uit ikwadilaina gabuna ai e haboumu na heto.

¹³ Siona natuna kekenina e,
 a tore isi, a kwadidia!
 Badina be doamu na auri ai baina halaoa,
 bona aemu na auri-laboralabora ai baina halaodia;
 bese momo ba botadia patapata,
 edia kohu na ba hahelagaia, Iehova ena,
 edia taġa na ba hahelaġaia, tanobada idoinai Lohiana ena.

5 ¹Harihari vada e maġumu ahu;
 vada e kouda heġege;
 hebota auna amo
 Israel lohiana vahana e botaiamu.

Hahemauri Tauna Betelehem amo

² Betelehem Efrata e,
 oi na maragi, Iuda iduhudia bogaragidiae,

to oiemu amo tau ta baine tore isi egu,
 ia na Israel lohiana ai bainela;
 ena hematama na nega gunana amo,
 sene negadia amo.

³ Taunabunai, ia ese baine rakatanidia,
 ela bona hekamonai hahinena baine mara negana ai,
 benil tadikakana orena bae lou mai
 Israel taudia dekediai.

⁴ Bena ia na baine gini, ena mamoe serina baine ubua,
 Iehova goadana ai,
 Iehova, ena Dirava, ladana siahuna ai.
 Idia na mai mainodia ida bae noho,
 badina be ia na baine bada,
 ela bona tanobada dokodia.

⁵ Maino dalana binai,
 Asuria tauna na eda kaha ai bainema,
 bona eda tano baine moimoilaia negana ai:
 ita ese mamoe iregudia taudia hahitu baita hagnidia, ia ilao-ahuna,
 bona hanua lohiadia taurahani danu.

⁶ Idia ese Asuria tanona bae lohiaia, dare amo;
 bona Nimrod ena tano danu, ala-ala darena amo.
 Idia ese Asuria tauna imana amo bae hamaurida,
 eda kaha bainema, eda tano baine moimoilaia, negana ai.

⁷ Bena Iakob taudia kwabukwabudia na
 beso momo bogaragidiai bae noho,
 hunu Iehova ena amo na heto,
 medu batugu rei latanai na heto;
 unu na asie halahemu, taunimanima daidiae,
 taunimanima natudia asie naridiamu.

⁸ Iakob taudia kwabukwabudia na
 basileia idau-idau bogaragidiai bae noho,
 beso momo bogaragidiai bae noho,
 leona uda boromadia bogaragidiai na heto,
 leona natuna mamoe seridia bogaragidiai na heto;
 e raka hanaimu negana ai,
 e moi tao moi taomu,
 e dare patapatamu,
 asi tauna ta baine hahemauri.

⁹ Imamui na bae heabi isi, amui inai taudia daediae,

inaimui na bae henege daure.

- ¹⁰ Iehova na e tomu: Una dina ai
 emui hosi na baina aladia mase bogaragimui ai,
 bona emui kariota baina hamakohidia rohoroho.
- ¹¹ Emui tano hanuadria baina habuadria tari,
 bona emui gabu aukadia iboudiai baina ġigidia dobi;
- ¹² mea ġaudia na imamui ai baina hamakohidia,
 emui rohe taudia na bae ore;
- ¹³ emui kaivakuku baina utudia gari,
 bona emui au-tubua danu bogaragimui ai;
 bena imamui amo e kara ġaudia na
 basio toma henidria diho lou;
- ¹⁴ emui au-tubua helaġadria baina hagaridria bogaragimui ai,
 bona emui hanua baina habuadria tari.
- ¹⁵ Mai badugu ida bona mai badu-ġaraġaragu ida,
 lau ese dava baina kara,
 asi edia kamonai besedia latadi.

Iehova ese Israel e gwau henia

- 6**
- ¹ Iehova ena hereva a kamonai:
 A tore isi, ororo vairadiai emui gini-kau gabuna ba
 herevalaia,
 ororo komutadia na gadomui bae kamonai.
- ² Ororo e, Iehova ena gwau-gwau herevadia a kamonai,
 tanobada badidia, o mia hanaihanaimu gabudia, danu a
 kamonai;
 badina be Iehova ese ena bese taudia e gwau henidiamu,
 ia ese Israel baine heai henia.
- ³ Egu bese taumui e, ede vada na karamui toma?
 Ede vada na hahisihismui toma?
 A haere henigu.
- ⁴ Badina be Aigupto tanona amo na hakaumui lasi,
 iġui rumana amo na hamaurimui;
 Mose bona Aaron bona Miriama na
 umui vairamui ai na siaidia guna.
- ⁵ Egu bese taumui e, ba laloa,
 Balak, Moab pavapavana, ena lalo-hata be dahaka,
 bona Balaam Beoro ese ede e haere henia toma,
 bona Sitim ela bona Gilgal dahaka e vara;
 bena Iehova ena hahemauri karadia ba diba.

Iehova ena ura

- 6 Dahaka baina mailai Iehova vairanai,
 atai Diravana baina toma henia diho totona?
 Gole-oho boubou ġaudia ia vairanai baina mailaidia a?
 Boromakau natudia, laġani tamona ġaudia, a?
- 7 Iehova ese nani mamaruanedia daha daha baine moalelaidia a?
 Eiava dehoro sinavaidia gerebu gerebu a?
 Natugu roboana baina hen, egu kerere davana, a?
 tau-anigu amo e vara ġauna baina hen, laumagu ena dika
 davana, a?
- 8 Taunimanima e, ia ese vada e hamaoromu, kara namona be dahaka,
 Iehova ena ura oiemu ai be dahaka.
 Ina mo: ba hahemaoro ġoevaġoева, hebogahisi ba ura henia,
 bona emu Dirava ida ba raka hebou mai manaumu ida, ani?
- 9 Iehova gadona ese hanua e boi heniamu,
 (oi ladamu igarilaina na aonega namona),
 e tomu: Bese laumui boua hanua laumui e, a kamonai!
- 10 Kara dika kohudia, kara dika taudia edia ruma ai,
 bona hahetoho koikoi karadia, e uduguiraidiamu gaudia,
 baina lalodia boio diba a?
- 11 Mai ena hahetoho ġauna dikana
 bona ena hahetoho auridia koikoidia modana tauna na
 maorona baina gwauraia a?
- 12 Emui taġa taudia na daġedäge ai e honumu;
 emui hanua taudia na e hereva koikoimu,
 maladia na mai koikoidia, ududia lalodiae.
- 13 Taunabunai lau ese vada na rahumui mase matama;
 vada na habuamui, emui kara dika daidiae.
- 14 Bavani, a bogamui basie kunu,
 tau-animui do bae hitolo;
 ġau bavato tabe, to basio gogo,
 bona ba gogo ġaudia na lau ese dare baina henia.
- 15 Ba hadohado, to basio ġeigei;
 olive huahuadia ba moimoilai, to kopimui na dehorodia basio
 dahulai;
 vine huahuadia ba moimoilai, to vine ranuna basio inua.
- 16 Badina be Omri ena taravatu vada o badinadia,
 bona Ahaba iduhuna ena ġaukara idoinai danu,
 bona edia hahealo ai vada o raka;
 una dainai baina habuamui tari,

emui hanua taudia na bae si henidia,
bona bese idau-idau ese bae ihi-ihiraimui.

Israel ena kara bodaga

- 7** ¹Madi ihabaigu!
 Lau na huahuana vada e buruki ore auna
 eiava vinena vada e gogo ore imeana na heto;
 asi vine-takona ta mia, lau ese baina ania,
 asi suke-huahuana ta, egu hitolo ilao-ahuna.
- ²Dirava imatauraina tauna vada e mase tanobada ai,
 asi kara-maoromaoro tauna ta noho, taunimanima bogaragidai;
 iboudiai na e banimu, rara ihahebubuna totona,
 iboudiai ese huo e otomu, tadikakadia iabidia totona.
- ³Imadia na e heḡaeḡaemu, kara dika ikarana,
 vada bae kara balaheni;
 hanua lohiana bona hahemaoro tauna ese
 henitao koikoi ḡauna e tahuamu,
 bona tau badana ese ena heḡahusi ḡaudia e gwauraimu;
 unu amo kara maoromaoro e moḡeamu.
- ⁴Idia bogaragidai tau namona na ava ġiniġini na heto,
 bona kara maoromaoro tauna na au ginigini na heto.
 Edia gima taudia edia dina, edia dava-abi dinana, vada e gini dae,
 harihari ihabuadiah dinana be kaumu.
- ⁵Dekemu tauna basio abidadama henia,
 turamu basio abiabiraia;
 udumu ba naria,
 dekemu ai e hekuremu hahinenen enai;
- ⁶badina be mero ese tamana e dadaraiamu,
 bona kekeni ese sinana e inai heniamu;
 rava-maraġi hahinenen ese rava-bada hahinenen e daġedaġe heniamu,
 bona rumu taudia korikoridia ese rumu biaguna e inai heniamu.
- ⁷A lau ese Iehova baina haġere,
 ihamaurigu Diravana baina naria;
 egū Dirava ese baine kamonai henigu.

Iehova ena Hahemauri

- ⁸Inaigu e, lau latagu ai basio moale;
 baina keto negana ai ma baina tore isi;
 dibura ai baina helai negana ai,
 Iehova na egū diari ai bainela.
- ⁹Iehova ena badu henunai baina haheauka,

badina be vada na kara dika henia;
 eIa bona ia ese egu gini-maoro gabuna baine herevalaia,
 bona hahemaoro baine karaia lau daigu ai.

Ia ese diari ai baine hakaugu lasi,
 ena hahemauri do baina itaia.

¹⁰ Bena inaigu ese baine itaia,
 bona e hereva henigu, eto
 “Iehova, emu Dirava, na edesenai ai?”, hahinena na
 hemarai ese baine ġovαιa ahu.

Matagu ese ena hemarai bae moalelaia;
 harihari vada bae moimoilaia,
 ariara kopukopudia na heheto.

¹¹ Emui maġu ihaginidia dinana!
 Una dina ai emui tano hetoadia bae bada.

¹² Una dina ai taunimanima na dekemui baema,
 Asuria amo ela bona Aigupto,
 Aigupto amo ela bona Sinavai Badana,
 davara amo ela bona davara,
 ororo amo ela bona ororo.

¹³ A tanobada na baine vahu
 inoholaina taudia daidiae,
 edia kara huahuadie daidiae.

Iehova ena hebogahisi

¹⁴ Emu bese taudia na emu itotohi amo ba reġudia,
 idia na emu mamoe korikoridia;
 idia na uda ai e noho hedoamu,
 biru tanodia bogaragidiae.
 Basan ai bona Gilead ai bae heubu,
 nega gunadia heġereġeredia.

¹⁵ Aigupto tanona amo o raka lasi dinadia ai heġereġerena
 lau ese hoa ġaudia baina haheitalaidia.

¹⁶ Bese idau-idau ese bae itaia, bena bae hemarai,
 edia goada idoinai hemaraina bae hemarai;
 ududia na imadia amo bae tao ahu,
 taiadia na bae kudima.

¹⁷ Ĝahu bae demaria, gaigai na heheto,
 tano ai e raumu ġaudia na heheto;
 edia gabu aukadia amo bae raka lasi,
 mai heude-heudededia ida;

Iehova, eda Dirava, bae haǵereia mai garidia ida,
 oi daimu ai bae gari.

¹⁸ Edena Dirava na oi heǵereǵeremu?

Kara dika e gwau taomu,
 bona kerere e lalo negemu,
 dihina kwabukwabudia daidai.

Ia ese ena badu basine hahesiriua hanaihanai,
 badina be hebogahisi e moalelaiamu.

¹⁹ Ia ese ma baine bogada hisi,

ia ese eda kara havara baine moidia tao,
 ia aena henudiae.

Oi ese emai kara dika iboudiae na

davara ena dobu gabudiae ai ba negedia.

²⁰ oi ese emu heabidadama na Iakob ba hahedinarai henia,

bona emu hebogahisi na Abraham ba haheitalaia,
 senemai o gwau henidiae hamata heǵereǵerena,
 nega gunadia amo.